

ՄԱՄՈՒԼԻ ՏԵՍՈՒԹԻՒՆ

«Լուսայի» անցեալ համարում յայտնել էինք, որ լոյս տեսաւ դադարած հայկական «Նոր-Դար» լրագրի առաջին համարը և մի օրում սպառուեցաւ հինգ հազար օրինակ. այդ արդէն ապացոյց էր, թէ որ աստիճան ընթերցող հասարակութիւնը զգում էր մի օրինաւոր թերթի պահանջ, որ յագեցնել անկարող էր վերջին տարիների մամուլը: Այժմ «Նոր-Դարը» սկսել է լոյս տեսնել կանոնաւոր կերպով և ընդարձակուած— մայրաքաղաքների մեծ թերթերի չափսով: «Նոր-Դարի» հետ միաժամանակ սկսաւ կանոնաւոր կերպով լոյս տեսնել և պ. Գ. Մելիք-Ղարաբեօղեանի «Արշալոյս» ամենօրեայ թերթը նոյնպէս մեծ ծաւալով և հետաքրքրական բովանդակութեամբ: Մենք ողջունում ենք այդ երկու թերթերի հրապարակ գալը, ցանկալով կատարեալ յաջողութիւն:

Երկար ժամանակ մի խումբ մարդիկ իրանց օրգան թերթով աշխարհ էին թնդացնում ընտրական սկզբունքների և հասարակաց շահերի պաշտպանութեան խնդրով. ընտրական սկզբունքը խախտուեցաւ, ժողովրդի իրաւունքները ոտնատակ եղան, պէտք է ընտրական սկզբունքը գործադրել լայն ծաւալով ևն ևն, աղաղակում էին նոքա, երբ ձեռնառու էր իրանց, երբ այդ բանից չէր տուժում կուսակցական շահերը: O tempora, o mores, ժամանակները փոխուել են. քա՛մին ուրիշ տեղից է փչում. այժմ ամեն մի խմբակ իրան իրաւունք է համարում հասարակաց անունից խօսել, ժողովրդի անունից դատել և... կարգադրութիւններ անել, ներկայացնելով մի մի ինքնակոչ յանձնաժողով կամ մասնաժողով, յանձնախումբ կամ մասնախումբ: Ականջդ կանչի Պարոնեան: Յիշեցէք վերջին եօթնամիսների ընթացքում կազմուած մասնաժողովների գոյութեան պատմութիւնը: Այդ տեսակ յանձնաժողովներից մէկի— դպրոցական յանձնաժողովի մասին խօսելով վերանորոգուած «Նոր-Դարը» իւր 3 համարում, մի իմաստալից և նշանակալից յօդուածում ասում է.